

10 APR 1998

Mahathir-pendatang

PENDIRIAN TERHADAP PENGHANTARAN PENDATANG TAK BERUBAH, KATA DR MAHATHIR

KUALA LUMPUR, 10 April (Bernama) -- Datuk Seri Dr Mahathir Mohamad berkata pendirian Malaysia untuk menghantar pulang semua pendatang tanpa izin tetap tidak berubah.

"Pendirian kita terhadap penghantaran pulang kesemua pendatang tanpa izin masih sama," katanya kepada pemberita selepas mempengerusikan mesyuarat Majlis Tertinggi Umno di Pusat Dagangan Dunia Putra, di sini, malam ini.

Beliau berkata demikian ketika menjawab soalan daripada wartawan agensi berita asing berhubung penghantaran pulang pendatang tanpa izin.

Mengenai laporan dari Jakarta menyebut Malaysia tidak melayani pendatang tanpa izin Indonesia dengan baik Dr Mahathir berkata: "Itu satu soal pendapat."

"Kita melakukan apa yang terbaik, dan jika mereka merusuh, polis terpaksa bertindak," kata beliau.

Dalam kejadian rusuhan di depot tahanan imigresen Semenyih pada 29 Mac lepas, seorang anggota polis dan lapan pendatang terbunuh setelah pendatang dari Indonesia menyerang polis dalam operasi menghantar mereka pulang.

Dr Mahathir berkata mesyuarat Majlis Tertinggi turut membincangkan pergaduhan antara satu kumpulan pemuda Hindu dan Islam berhubung isu pembinaan kuil bersebelahan sebuah masjid di Kampung Rawa, Pulau Pinang, pada 27 Mac lepas, dan menganggap masalah itu sudah selesai.

"Malam ini kaum Hindu ada perayaan keagamaan dan saya tidak menerima apa-apa aduan terhadap kejadian yang tidak diinginkan.

"Kejadian di Kampung Rawa sudah selesai, tinggal lagi kita kena berhati-hati kerana kadang-kadang ada pihak tidak bertanggungjawab yang cuba api-apikan," katanya.

Beliau juga berkata sebarang masalah yang dihadapi itu perlu diselesaikan melalui rundingan.

"Tindakan awal perlu diambil sebelum ia menjadi satu isu besar," katanya.

Dr Mahathir juga berkata mesyuarat Majlis Tertinggi turut membincang masalah kebakaran terbuka dan menyambut baik cadangan kerajaan supaya mereka yang terbabit dengan kebakaran terbuka dipaksa membiayai kos memadam kebakaran itu.

Katanya, ini adalah tindakan tambahan yang dikenakan kepada mereka yang terbabit dalam kebakaran terbuka selain denda dan penjara lima tahun.

"Hukuman yang lebih tegas ini perlu diambil kerana kerajaan memandang kebakaran terbuka ini sebagai satu jenayah," katanya.

Pada masa ini sesiapa yang terbabit dalam kebakaran terbuka dikenakan hukuman denda sehingga RM100,000 atau penjara lima tahun atau kedua-duanya sekali.

Berhubung siasatan terhadap dakwaan kononnya Ketua UMNO Bahagian Selayang, Datuk Saidin Thamby menerima cek bernilai RM1 juta, Dr Mahathir berkata siasatan masih dilakukan pada peringkat Jawatankuasa Teknikal parti. --BERNAMA

ARA MAI